

Ilinniagaqarneq inuussutissarsiuteqarnerlu pillugit ilitersuisarneq pillugu Inatsisartut inatsisissaattut siunnersuut

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Saqqummiineq**Siullermeerinnineq**

Ilinniagaqarneq inuussutissarsiuteqarnerlu pillugit ilitersuisarneq pillugu Inatsisartut inatsisissaattut siunnersuut Naalakkersuisut sinnerlugit matumuuna saqqummiuppara.

Siunnersuut suliarineqarpoq nalunaarusiaq una aallaavigalugu: ”Kalaallit Nunaanni ilitersuisarneq pillugu nalilersuineq” juni 2011-meersoq aamma innuttaasut ilinniarsimasuunerisa qaffasissusaat ilinniagaqarnissamullu kajumissuseqartinnerat qaffatsinniarlugu Naalaakkersuisoqatigiit isumaqatigiissutaanni anguniagassatut Naalakkersuisut anguniagaat. Aammattaq inuusuttut meeqqat atuarfianni naammassisut suliffeqalersimangitsut ilinniagaqarnermilluunniit aallartitsisimangitsut immikkut suliniutigineqarfigineqanissaannik naalakkersuisooqatigiit isumaqatigiissutaanni anguniakkap angunissaanut siunnersuut pingaaruteqartumik sakkutut isigineqassaaq.

Siunnersuut Ilinniartitaanermut, Ilageeqarnermut, Kultureqarnermut Naligiissitaanermut Naalakkersuisoqarfiup, Inuussutissarsiornermut, Aatsitassarsiornermut Suliffeqarnermullu Naalakkersuisoqarfiup KANUKOKA-llu qanimut tamanna pillugu suleqatigiinnerisigut suliarineqarpoq.

Siunnersuummi qulliinerusumik siunertaq tassaavoq ilitersuisarnerup ataatsimut isigalugu pitsanngorsarnissaa. Siunnersuummi ilaatigut ilitersuisarneq imminut atasunngortinniarnearpoq ilinniarfinnilu ikaarsaariarnermut tunngatillugu tapersiissutit qulakkeerneqarniarlutik.

Siunnersuummi immikkoortut pingaarnerit ilaat uani erseqqissassavakka.

Akisussaaffiit agguataarnerat siunnersuummi ersarissumik aalajangersarneqarput, tassani erseqqissarneqarluni kikkut sumut akisussaasuunersut. Tamanna qitiusumi sumiiffinnilu pissaaq.

Nutaatut aalajangersarneqarpoq ilitersuisarneq pillugu nittartakkap pilersinnissaa ingerlanneqarnissaalu Naalakkersuisut isumagissagaat. Nittartagaq salliutillugu ilitersorniarnearniartunut tunngatillugu ilitersuinermi neqeroorut, nittartagarli aamma

ilinniagaqarnermut inuussutissarsiuteqarnermullu tunngatillugu pisortanit ilitersuisarnermilu pissutsinik soqutigisaqartunit tamanit atorneqarsinnaassaaq.

Kalaallit Nunaanni oqallittarfimmi pilersitsinissamik Naalackersuisut siunnersuummi aamma pisussaaffilerneqarput, tassani isumassarsianik, ilisimasanik, misilittakkanik il.il. paarlaasseqatigiittarnissaq siunertaralugu soqutigisaqartut naapissinnaassallutik.

Naalackersuit suliassaannut tunngatillugu siunnersuummi siunnersuutigineqarpoq, taakku pisortat immikkoortorta qarfianni inatsisikkut aalajangiiffigineqartumi (Kalaallit Nunaanni Qitiusumi Iltersuisarfik) aqutsinermi Naalackersuisut ataanittumi suliarineqartassasut.

Aammattaaq siunnersuutigineqarpoq nuna tamakkerlugu ilitersuisarneq pillugu isumasioqatigiinnik pilersitsisoqassasoq, taakkulu suliarissavaat ilitersuisarnerup ineriartortinneqarnera pillugu qulliunerusumik tamanullu tunngasumik siunnersuisarnissaq aammalu ilitersuisarnerup aaqqissuunneqarnera tulleriinnilersuinerlu pillugit Naalackersuisunut aamma Kalaallit Nunaanni Qitiusumik Iltersuisarfimmu siunnersuisarneq.

Tamassuma saniatigut kommunini siunnersuisarfiit iliuusissatut pilersaarutit meeqqat atuarfianni suliarineqartut aallaavigalugit ilinniagaqarnissami iliuusissatut pilersaarutini suliaqartussaataitanerat nutarterisussaataitanerallu siunnersuummi saqqummiunneqarpoq. Tamassumunnga atatillugu ikaarsaariarneq pillugu ilitersuinerni ilinniagaqarnissami iliuusissatut pilersaarutit suliarineqarnerannut tunngavittut meeqqat atuarfianni atuartunut ingerlanneqartuni kommunini ilitersuisarfinnik peqataatitsisarnissamik kommunalbestyrelsit pisussaaffilerneqarput.

16-iniit 18-inut ukiulinnut (inuusuttut anguniakkat) tunngatillugu ujartuilluni ilitersuisarneq suliassap taassumarpiaap pingaartinneqarnera erseqqissarniarlugu kommunini ilitersuisarfiit ilitersuisarnermi immikkut pisussaaffiattut aalajangersarneqarpoq

Ataatsimut isigalugu siunnersuut Naalackersuisut matumuuna saqqummiuppaat ilitersuisarnerup pitsaassusianik annertuumik qaffatsitsisussaq, tamassumalu kinguneranik inuiaqatigiinni tamanut tunngatillugu ilinniarsimasuunerup qaffatsinneqarneranik kinguneqartussaq.

Taamatut naatsumik oqaaseqarlunga siunnersuut Inatsisartunut suliassanngortippara.